



Sü e sü pellas muntognas

Actualmaing ed infin als 18 d'avrigl vain muossada i'l center cultural a Nairs/Scuol ün'exposiziun dad Uriel Orlow da Turich, cul titel «Up-Up-Up». A man da fotografias muossa el las consequenzas dal müdamaint dal clima eir illas muntognas engiadinaisas.

BENEDICT STECHER/FMR



Cun sia camera es Uriel Orlow in tschercha da la vegetaziun in muntogna – üna vegetaziun chi va adüna plü ferm amunt.

FOTO FLURIN BERTSCHINGER

Culla camera s'ha rendü il fotograf artist *Uriel Orlow* illa flora unica da las muntognas in Engiadina in tschercha da las cumpruvas dals müdamaints dal clima. Sias fotografias dan uossa invista a quists müdamaints. L'artist ha collavurà cun differents scenziats. El as referischa cun sias fotografias als resultats da retscherchas fundadas.

Ün pass ouravant a l'umanità

Uriel Orlow as focusescha per exaimpel sülla comunicaziun da las ragischs da plantas e sülla müdada da la vegetaziun süllas muntognas. Il movimaint da quista vegetaziun, cun temperaturas vieplü chodas

vers insü, es tant per las plantas sco eir pels umans üna sfida. Cun videos e cun disegns sün palperi muossa Uriel Orlow in si' exposiziun i'l center cultural a Nairs co cha la natüra es bod adüna ün pèr pass ouravant a l'umanità.

Sia lavur artistica as basa sün retscherchas e discuers cun umans ch'el inscuntra sün sias excursiuns. Il punct da partenza per sia art es adüna orientà al process da lavur e vain documentà cun films, fotografias, disegns e musica. Uriel Orlow ha lavurà repetidamaing in Africa ed in India e piglia impustüt plantas sco perdütas da seis focus, la müdada dal clima.

Collavuraziun cul PNS

Sco cha *Christof Rösch*, il co-directur da la Fundaziun Nairs cun labor da cultura, hal-la d'art e chasa d'artists, ha dit, es Uriel Orlow stat diversas jadas a Nairs: «El ha perscrutà e collavurà insembel cul Parc Naziunal Svizzer PNS bel ed aposta per l'exposiziun actuala. El ha il bsögn da muossar ils svilups e la relaziun tanter il müdamaint dal clima e la botanica.» L'augmait da la temperatura ha üna grond'influenza sün l'ecosistem, sün l'ambiain e sülla diversità da plantas e flora. Christof Rösch: «Uriel Orlow es süllas passivas da process zoppats ed invlidats sco fenomenes da la natüra.»

Sün trais plans i'l center a Nairs sun expostas las ouvras dad Uriel Orlow chi



muossan videos, disegns da fluors e fotografias cun diversas consequenzas da l'augmoint da la temperatura.

L'exposiziun «Up Up Up» es averta amo fin ils 18 d'avrigl 2022 adüna da gövgia fin dumengia da las 15.00 fin las 18.00. Detagls: www.nairs.ch.

Lunga glista d'exposiziuns

Uriel Orlow (1973) da Turich viva e lavura a Lissabon, Londra e Turich. El ha fat ils stüdis al College of Art & Desig ed a la Slade School of Fine Art a Londra ed a l'università a Geneva. Uriel Orlow ha pudü tour incunter diversas distincziuns e premis in Svizra ed il ester, il premi d'art da Turich e trais Art Awards. L'artist ha expos a Mainz, Brüssel, Athen, San Sebastian, St. Gallen, Paris, Johannesburg, Londra, Turin, Istanbul, in Islanda ed oters plü. El ha eir expos a diversas Bienallas. La glista da sias exposiziuns es lunga e muossa in möd impreschiunant cha sias lavuors artisticas sun fich retscherchadas.